



**V**alentinianus eruditione & omnis generis uirtutibus apud Rhetos suo tempore nulli secūsus extitit. Itaq; Eddone mortuo ipse omniū consensu 7 Curiensis præsul electus fuit, an. Christi 550. Hic Christianos passim ob Barbarorum incursions afflictoſ consolatus est, & spe uitæ æternæ omnes ad uirtutes excitauit. Postea quoq; S. Lucij templum erexit, atq; moriens in eodem sepultus fuit. Is locus postea in Monasteriū conuersus. Eius successor Paulinus ex fratre nepos, marmori, quod sepulchro impositum fuit, tale epitaphium insculpsit:

Hoc iacet in tumulo quē defleuit Rhetica tellus,

Maxima summorum gloria pontificum:

Abiectis qui fudit opes, nudataq; texit

Agmina, captiuis præmia larga ferens.

Est pietas uicina polo, nec funeris ictum

Sentit ouans factis quæ fecit astra bonis.

His pollens titulis Valentiniane sacerdos

Crederis à cunctis non potuisse mori.